

nunc sedentes et adulterinis quorundam pestilentium regentium et antepositorum in facto guerre vigentis seductionibus et mendosis fictionibus obfuscatos, veritatis detegendo rectitudinem, piis affatibus alloquamur, ne presides ipsi, veneno detractionis infecti et ambitionis cupidine turpiter excecati, assumpto mendacii spiritu falsis eorum persuasionibus vos in profundum malorum precipites secum trahant; hii profecto rectores et antepositi, quos gloria vexat inanis, sic elati sunt in superbia, ut luciferini cum principibus sedere cupiant et in solio presidere glorie dominantis, nullam libertatem querentes nullamque ad concives suos vel quosvis alios caritatem habentes vel amicitiam, quicquid fingant, adeo ceci facti cupiditatis ingluvie, ut videntes non videant nec intelligant audientes. Sed utinam saperent et novissima providerent ac pariter providerent. Quid autem demeruerat apud ipsos Romana ecclesia, fidelium omnium pia mater et magistra, in cuius gremio commune Florentie prerogativa speciali quiescebat, et que ipsum commune, ut de retroperitis taceamus, proximis etiam temporibus coaluit et defendit velati pullos suos gallina sub alis, et a servitute tyrannica, cui propinquum erat, pluries ut est notorium preservavit. Ipsi vero rectores et antepositi, prosperitatis ipsius invidi, nulla occasione vel culpa eiusdem ecclesie nullaque diffidatione precedentibus, quinimo colligatione durante prioribusque nobis scribentibus, cuiusmodi scripturas studiose servamus, quod ecclesiam in nullo offenderent nisi ipsa primitus inchoaret, repente lectu atrociter debacchantes et insanientes, in ipsam omnes eius terras ad rebellionis sevicium clandestinis mendaciorum flatibus perfidisque suggestionibus concitarunt, ipsamque insontem, suo inebriati furore ac morbo ingratitude fedissime laborantes, alias inauditis affecerunt et obstinatione dampnabili affligere non desistunt iacturis, gravibus iniuriis et offensis. O ceca ambicio, que nec Deum timet nec homines reveretur. O quam funesta rabies, que tantarum cedum, incendiorum, delationum, stuprorum et aliorum innumerorum et horrendorum facinorum non metuerit causam et initium propinare. O quam barbarica ferocitas omni beluina crudellior, que manus sacrilegas in christos domini, quibus olim pharaoica impietas adhuc de proprio alimenta prebebat, extendere, bona eorum mobilia distrahere et, quod alias per quoscunque quantumcumque nefandos persecutores ecclesie nunquam factum fuisse narratur, immobilia alienare et Dei prophanare sanctuarium non expavit. Vos autem convenimus, o popule, qui tanquam pusillus grex ad excidium temporale et eternum supplicium ducimini per predictos. Quid vobis profuit aut prodesse vel quem fructum proferre potest miserabilis ista vestrorum collisio vicinorum, qua divisis ac frementibus in se communitatibus et universitatibus quamplurimis, ac patre in filium, fratre in fratrem, cive in civem, et contra sevientibus, tot mortes, depopulationes agrorum et infinita scandala continue peradorum ipsorum predam vestrorum ministerio perpetrantur, et tota Italia periculationi subicitur ac ruine, qua etiam efficiuntur plebis ablectio et omni obprobrium nationi, pro qua quidem concussione fovenda vestra corroditur substantia, et figmentis fallacibus adinventionibusque dolosis per prefatos detinemini, abstruso veritatis lumine vinculati. Asserunt enim ut accepimus, licet falsitate